



JUDICIAL **SYSTEM** MONITORING PROGRAMME
PROGRAMA MONITORIZASAUN BA **SISTEMA** JUDISIÁRIU

Rua setubal Colmera Dili, Timor Leste
Po Box 275, Telefone: 3323883, info@jsmp.minihub.org
www.jsmp.tl
Face book: jsmp.timorleste

JSMP: Servisu atu garante justisa ba ema hotu...!

Suku Nanu husu ba Parlamentu Nasional no Governu tenki konsidera asuntu kulturál no relijiaun iha prosesu halo lei hodi prevene divórsiu

Iha 6 Agostu 2015, Programa Monitorizasaun ba Sistema Judisiáriu (JSMP) kontinua realiza treinamentu kona-ba “Demokrasia no kna’ar Parlamentu Nasionál iha prosesu halo lei” iha Suku Nanu, Sub distritu Fatumea, Distritu

Covalima. Treinamentu ne'e hetan partisipasaun másimu husi comunidade no estrutura suku sira. Totál partisipante ne'ebé partisipa iha treinamentu ne'e hamutuk na'in 30, kompostu husi feto na'in 12 no mane na'in 18. Durante treinamentu comunidade sira husu ba Parlamentu Nasionál no Governu tenki konsidera asuntu kulturál no relijiaun iha prosesu halo lei hodi prevene divórsiu. Abel Mendonça preokupa tanba depoisde ukun-an no tanba demokrasia garante liberdade nu'udar direitu ba ema idak-idak nian, iha ema barak ne'ebé simu tiha sakramentu kaben depois divórsiu tiha, nune'e laiha lei ida atu regula sira.

Abel deklara katak aktu divórsiu hirak ne'e, ikus-mai abandona hela labarik sira moris ki'ak. Tanba ne'e nia husu ba parlamentu no governu bainhira atu halo lei presiza konsidera asuntu sosiál, kulturál no relijiaun nune'e bele refleta kontestu réal povu nian no prevene divórsiu. Aleinde ne'e partisipantes sira mós husu atu órgaun rua ne'e tenki loka konsultasaun adekua ba públiku no halo sosializasaun ba lei aplikavel sira ba povu atu hatene.

“JSMP husu ba Parlamentu Nasionál no Governu atu konsidera comunidade sira nia hanoin iha prosesu halo lei, nune'e bele refleta realidade moris povu nian, hanesan preokupasaun kona-ba dirvórsiu no abandonu ba labarik sira ne'ebé comunidade Suku Nanu foti iha treinamentu ne'ebé JSMP fó,” dehan Diretór Ezekutivu JSMP, Luis de Oliveira Sampaio.

JSMP konsidera importante mós ba Governu tenki halo disiminasun informasaun kona-ba lei sira hotu ne'ebé vigora iha Timor-Leste, nune'e povu bele hatene, liu-liu ba lei importante sira hanesan; Kodigu Penál, Kódigu Prosesu Penál no Kodigu Sivíl no nia prosesu, inklui Lei Violénsia Doméstika, ne'ebé iha relasaun ho povu nia situasaun moris loro-loron nian.

Iha treinamentu ne'e Xefi Suku Nanu, Sr. Venancio Madeira Mendonça agradese ba JSMP nia representante sira tanba bele hakat to'o iha sira nia suku hodi fahe informasaun kona-ba prosesu halo lei no demokrasia. Tanba ne'e Xefe Suku Nanu husu ba partisipante sira hotu atu bele sériu tuir treinamentu ne'e no depois bele kontinua fahe tutan tan informasaun refere ba comunidade sira seluk ne'ebé lahetan oportunidade partisipa atu hatene.



Trainamentu ne'e realiza tanba hetan apoiu finansieru hosi fundu sosiedade sivíl IV Governu Konstitusional Timor-Leste.



Povu suku Muapitine preokupa ho kazu inestu kontra labarik sira no husu atu kria artigu espesifiku

Iha 06 Agostu 2015, JSMP organiza treinamentu ba dala 3 kona-ba “Demokrasia no kna’ar Parlamentu iha prosesu halo Lei” iha Suku Muapitine, Postu Administrativu Lospolos, Municipiu Lautem.

Treinamentu ne'e hetan partisipasaun másimu husi comunidade no estruktura suku sira. Total partisipantes ne'ebé participa iha treinamentu ne'e hamutuk nain 30; kompostu husi feto nain 23 no mane nain 7.

Durante treinamentu comunidade sira senti preokupa tebes ho kazu inestu ne'ebé akontese dala barak iha nasaun Timor Leste. Tanba ne'e sira ejíje ba Parlamentu no Governu tenki kria artigu espesifiku hodi regula no fó kastigu ne'ebe makas ba autór krime inestu sira hodi prevene kazu ne'e labele mosu tan iha futuru.

“JSMP konsidera ejíjensia comunidade kona-ba kazu inestu pertinenti tebes atu bolu atensaun públiku no liu-liu ba órgaun lezislador sira estudu nian atu kriminaliza aktu seksuál ho natureza inestu tanba krime ne'e perturba teb-tebes valores sosiedade no destroi relasaun sagradu familia nian,” dehan Diretór Ezekutivu JSMP, Luis de Oliveira Sampaio.

Iha okaziaun barak ona JSMP diskuti asuntu ne'e ho autóridade competente sira Estadu nian, atu sensível ho realidade ne'e. JSMP mós apresenta ona relatóriu submisaun ida ba Parlamentu Nasionál no Governu atu konsidera hodi altera Kódigu Penál (KP) aktuál atu inkorpora artigu espesifiku ida kona-ba inestu iha KP. Submisaun ne'e produs bazeia ba JSMP nia rezultadu monitorizaun iha tribunál sira no ALFeLa nia esperensia servisu forneselementu assistensi legal ba vítima sira.

JSMP konsidera ejíjensia comunidade atu governu no parlamentu tenki desimina informasaun kona-ba lei importante sira no fahe lei sira ne'ebé pública iha Journal da Repúblika ba to'o iha sira nia suku atu comunidade sira iha suku bele asesu ho

livre. Iha treinamentu ne'e Xefi suku Muapitine Sr. Acacio da Silva agradece no konsidera importante tebes prezensa JSMP hodi fahé informasaun no rekomenda ba JSMP atu hato'o mós comunidade sira nia preokupasaun ne'ebé husu estadu atu halo lei ida hodi kriminaliza hahalok amante (*selingkuh*), *união-de-facto* (*kumpul kebo*) no poligamia ne'ebé la tuir kultura no reliziaun katolika nia prinsípiu ba parlamentu no governu.

Treinamentu ne'e realiza ho apoiu finanseiru husi doador Embaixada Finlandia iha Indonezia.



Família boot Judicial System Monitoring Program (JSMP)

Hato'o Parabens ba forsa Armada Libertasaun Nasionál Timor-Leste (Falintil) ne'ebé selebra aniversáriu tinan 40:

20 Agostu 1975 - 20 Agostu 2015

Imi mak libertador no defensor ba povu no lia-los



Mai hamutuk nafatin atu defende lia-los no justisa iha kontestu estadu independente no demokrátiku

Viva Falintil

Viva Aswain Timor Lorosa'e

Viva povu Timor-Leste

Eventu JSMP tuir mai :

- Iha 17 - 28 Agostu JSMP fasilita trenamentu ba lider komunitariu iha Distritu Covalima.
- Iha 21 Agostu, JSMP fasilita trenamentu ba Lider Komunitariu iha Distritu Aileu